



## საქართველოს გაერთიანებული სახელმწიფოს და სოფლის მეურნეობის მინისტრი

### ბრძანება N 2-903

07/10/2020

ქ. თბილისი

#### ქ. თბილისში შპს „კაპაროლ ჯორჯიას“ საღებავების საწარმოს ექსპლუატაციის პირობების ცვლილებაზე (მშრალი ნარევის საამქროს ასპირაციულ სისტემებში ციკლონების გამოყენება) სკრინინგის გადაწყვეტილების შესახებ

შპს „კაპაროლ ჯორჯიას“ მიერ გზშ-ის ჩატარების საჭიროების დადგენის მიზნით საქართველოს გარემოს დაცვისა და სოფლის მეურნეობის სამინისტროში წარმოდგენილია საღებავების საწარმოს ექსპლუატაციის პირობების ცვლილების (მშრალი ნარევის საამქროს ასპირაციულ სისტემებში ციკლონების გამოყენება) სკრინინგის განცხადება.

სკრინინგის განცხადების თანახმად, შპს „კაპაროლ ჯორჯიას“ საწარმო მდებარეობს ქ. თბილისში ალექსანდრე ქართველიძეის ქ. №8-ში, შპს „კაპაროლ ჯორჯიას“ კუთვნილ არასასოფლო-სამეურნეო დანიშნულების მიწის ნაკვეთზე (საკადასტრო კოდი 81.08.19.265), ტერიტორიის ფართობი შეადგენს 9450 მ<sup>2</sup>-ს. საწარმოს აღმოსავლეთის და ჩრდილოეთის მხრიდან ესაზღვრება თავისუფალი ტერიტორიები, ხოლო დასავლეთის მხრიდან საწარმოები. საწარმოდან უახლოესი საცხოვრებელი სახლი დაშორებულია 800 მ-ით.

2018 წლის 1 მარტს საქართველოს გარემოს დაცვისა და სოფლის მეურნეობის მინისტრის N 2-122 ბრძანებით გაცემულია შპს „კაპაროლ ჯორჯიას“ საღებავების საწარმოს მიმდინარე საქმიანობის გაგრძელების შესახებ გადაწყვეტილება (N5; 26.02.2018). ხოლო სამინისტროს მიერ 2018 წლის 10 დეკემბერს გაიცა გარემოსდაცვითი გადაწყვეტილება (ბრძანება N2-997) „კაპაროლ ჯორჯიას“ საღებავების საწარმოს ექსპლუატაციაზე. ამასთან 2019 წლის 7 ნოემბრის საქართველოს გარემოს დაცვისა და სოფლის მეურნეობის მინისტრის N2-1064 ბრძანებით გაცემულია სკრინინგის გადაწყვეტილება საწარმოს ექსპლუატაციის პირობების ცვლილებაზე, რომლის თანახმად დაგეგმილი ცვლილებები არ დაექვემდებარა გარემოზე ზემოქმედების შეფასებას. ექსპლუატაციის პირობების ცვლილება ითვალისწინებდა საწარმოში წარმოების საიმედოობის გაზრდისა და ტექნოლოგიური პროცესის უწყვეტობის მიზნით დანადგარების დამატებასა და შეცვლას, ჰაერისა და წყლის გამწმენდი სისტემების სრულყოფა-რეაბილიტაციას. ექსპლუატაციის პირობების ცვლილება არ ითვალისწინებდა გამოშვებული პროდუქციის სახეობის ცვლილებასა და რაოდენობის გაზრდას, ასევე ძირითადი ტექნოლოგიური დანადგარების ცვლილებას.

შპს „კაპაროლ ჯორჯია“ ფუნქციონირებს 2008 წლიდან. იგი აწარმოებს წყალდისპერსიულ საღებავებს წელიწადში 10000 ტ და მშრალ ნარევეს წელიწადში 10000 ტ წარმადობით. უშუალოდ საწარმოში დასაქმებულია 50-მდე ადამიანი. საწარმოში საქმიანობა ხორციელდება 8 საათიანი სამუშაო გრაფიკით, წელიწადში 250 დღე.

ტექნოლოგიურ პროცესში ძირითადად გამოყენებულია თანამედროვე ტიპის გერმანული მანქანა-დანადგარები, საწარმოს ტერიტორიაზე განთავსებულია ადმინისტრაციული კორპუსი, წყალდისპერსიული საღებავების საწარმო საწყობით, სასაწყობო ბაქანი და მშრალი ნარევის საამქრო. ეს უკანასკნელი ანგარის ტიპისაა, მის ჩრდილოეთ ნაწილში განთავსებულია ოთხი სილოსი.

სკრინინგის განცხადების თანახმად, საწარმოში იგეგმება მშრალი ნარევის საამქროში არსებულ ასპირაციულ სისტემებში მტვრის დამლექების შეცვლა და ნედლეულის მანუალურ ასაწონ სადგურზე დამატებითი გამწოვი ზონდის დადგმა. გათვალისწინებულია არსებული ჰაერგამწმენდი სალექარების ჩანაცვლება CIIH-40 ტიპის ციკლონებით. აღნიშნულის შედეგად გამწმენდი სისტემის ეფექტურობა გაიზრდება არსებული 85%-იდან 95%-მდე. ექსპლუატაციის პირობების ცვლილება არ მოიცავს გამოშვებული პროდუქციის სახეობის ცვლილებას, წარმადობის გაზრდას და ძირითადი ტექნოლოგიური დანადგარების ცვლილებას. არ იგეგმება ახალი შენობა-ნაგებობების მოწყობა და ტერიტორიის ფართობის გაზრდა. ამასთან ექსპლუატაციის პირობების ცვლილებები არ ეხება წყალემულსიური საღებავების საამქროს.

სკრინინგის განცხადების თანახმად, მშრალი ნარევის საამქროში არ შეიცვლება მტვრის გამოყოფის ბალანსი და ჰაერგამწმენდი სალექარების ციკლონებით ჩანაცვლება შეამცირებს ატმოსფეროში გაფრქვევის ინტენსივობას. შესაბამისად, საწარმოს ექსპლუატაციისას არ არის მოსალოდნელი ატმოსფერული ჰაერის ხარისხზე ნეგატიური ზემოქმედება.

წარმოდგენილი დოკუმენტაციის თანახმად, ციკლონები საწარმოში შემოიზიდება მზა სახით. სამონტაჟო სამუშაოები გაგრძელდება არაუმეტეს ორი დღისა, რა პერიოდშიც საწარმო არ იფუნქციონირებს.

სკრინინგის განცხადების თანახმად, საწარმოს ექსპლუატაციის პირობების ცვლილება არ მოახდენს ზემოქმედებას ზედაპირული და მიწისქვეშა წყლების დაბინძურებაზე.

საპროექტო ტერიტორიაზე არ ფიქსირდება ფლორისა და ფაუნის მნიშვნელოვანი სახეობები, რომელთაც განსაკუთრებული დაცვის ღონისძიებების გატარება ესაჭიროება. შესაბამისად, ფლორასა და ფაუნაზე ზემოქმედება არ არის მოსალოდნელი.

ექსპლუატაციის პირობების ცვლილებით მოსალოდნელია მცირე რაოდენობით საწარმოო ნარჩენების გაზრდა.

2020 წლის 25 სექტემბერს საქართველოს გარემოს დაცვისა და სოფლის მეურნეობის სამინისტროს და სსიპ გარემოს ეროვნული სააგენტოს წარმომადგენლების მიერ მოხდა საპროექტო ტერიტორიის ადგილზე ვიზუალური დათვალიერება. საწარმოს ტერიტორიის სამ სხვადასხვა ადგილას, საწარმოს შენობაში (ექსპლუატაციის პირობებში), საწარმოს ეზოში და საწარმოს ტერიტორიაზე შესასვლელ ჭიშკართან (GPS

კოორდინატები 1. X-0495628, Y-4616066; 2. X-0495605, Y-4616033; 3. X-0495498, Y-4616077) შეფასდა CO, NO<sub>2</sub>, მტვრის და ხმაურის მაჩვენებლები. ჩატარებული გაზომვების შედეგად დადგინდა, რომ აღნიშნული მონაცემები არ აჭარბებს დასაშვებ ნორმებს.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება გამოქვეყნდა სამინისტროს ოფიციალურ ვებგვერდზე და გადაგზავნილ იქნა სამგორის რაიონის გამგეობაში საინფორმაციო დაფაზე ან/და ოფიციალურ ვებგვერდზე განთავსების მიზნით. საზოგადოების მხრიდან აღნიშნულ საქმიანობასთან დაკავშირებით წერილობითი შენიშვნები და მოსაზრებები არ ყოფილა წარმოდგენილი.

ყოველივე ზემოაღნიშნულიდან გამომდინარე, საწარმოს ექსპლუატაციის პირობების ცვლილებისას (მშრალი ნარევის საამქროს ასპირაციულ სისტემებში ციკლონების გამოყენება) არ არის მოსალოდნელი გარემოზე მნიშვნელოვანი ზემოქმედება.

ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსის“ მე-5 მუხლის მე-12 ნაწილის, ამავე კოდექსის II დანართის მე-6 პუნქტის 6.2 ქვეპუნქტის საფუძველზე,

### **ვ ბ რ ძ ა ნ ე ბ:**

1. მიღებულ იქნეს სკრინინგის გადაწყვეტილება, რომ ქ. თბილისში, შპს „კაპაროლ ჯორჯიას“ საღებავების საწარმოს ექსპლუატაციის პირობების ცვლილება (მშრალი ნარევის საამქროს ასპირაციულ სისტემებში ციკლონების გამოყენება) **არ დაექვემდებაროს** გარემოზე ზემოქმედების შეფასებას;
2. შპს „კაპაროლ ჯორჯიამ“ საქმიანობა განახორციელოს საქართველოს გარემოს დაცვისა და სოფლის მეურნეობის მინისტრის 2018 წლის 10 დეკემბრის (ბრძანება N2-997) გარემოსდაცვითი გადაწყვეტილებით დადგენილი პირობების დაცვით, ექსპლუატაციის პირობების ცვლილებების გათვალისწინებით;
3. შპს „კაპაროლ ჯორჯიამ“ ექსპლუატაციის პირობების ცვლილებამდე უზრუნველყოს განახლებული „ატმოსფერულ ჰაერში მავნე ნივთიერებათა ზღვრულად დასაშვები გაფრქვევის ნორმების პროექტის“ სამინისტროსთან შეთანხმება (ექსპლუატაციის პირობების ცვლილების გათვალისწინებით);
4. შპს „კაპაროლ ჯორჯიამ“ ექსპლუატაციის პირობების ცვლილებამდე უზრუნველყოს განახლებული „ნარჩენების მართვის გეგმის“ შემუშავება და შეთანხმება სამინისტროსთან (ექსპლუატაციის პირობების ცვლილების გათვალისწინებით);
5. ზემოაღნიშნული პირობები წარმოადგენს საქართველოს გარემოს დაცვისა და სოფლის მეურნეობის მინისტრის 2018 წლის 10 დეკემბრის N2-997 ბრძანებით შპს „კაპაროლ ჯორჯიას“ საღებავების საწარმოზე გაცემული გარემოსდაცვითი გადაწყვეტილების განუყოფელ ნაწილს და მათი შესრულება სავალდებულოა;
6. ბრძანება დაუყოვნებლივ გაეგზავნოს შპს „კაპაროლ ჯორჯიას“;
7. ბრძანება ძალაში შევიდეს შპს „კაპაროლ ჯორჯიას“ მიერ ამ ბრძანების გაცნობისთანავე;

8. სკრინინგის გადაწყვეტილების გაცემიდან 5 დღის ვადაში აღნიშნული გადაწყვეტილება განთავსდეს სამინისტროს ოფიციალურ ვებგვერდზე და სამგორის რაიონის გამგეობის საინფორმაციო დაფაზე;
9. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

ლევან დავითაშვილი



მინისტრი